

連江縣志卷三十三

方外

儒墨之辨乾隆志綦嚴故於緇黃少所許可祇錄七人洎嘉慶志稍寬其例增多十人顧不無溢美者今茲所錄原本二氏之旨折衷一是之言蓋亦紀其所可紀豈道其所謂道耶

唐

章壽保安里人

乾隆志誤作章壽仙通志誤作永福人

幼牧羊於香鑪峯遇王謝二仙受學

得道嘗斬蛇於延平峯頂白日上昇峯旁石壁刻有章仙峰二字

兼采通志

蕭孔仲莊宗時進士遯跡連江山中披薙學道常馴伏猛虎歿而邑人祀

之兌峯

詳祠祀

僧獨覺中鵠里杜棠人俗姓張元和七年母鄭氏寢夢吞白蓮有娠及生祥光滿室鄉人異之七歲皈依寶林寺二十祝髮易名法詮宣宗時與涅槃怡山大滌諸禪師為法空友峰頂有巨石如覆盆詮頌偈以拄杖指之

連江縣志

卷三十三

唐宋方外

二十七

一夕風雷大作移石山下儼成一室詮禪栖其中巖有猛虎中獵矢至庵前委首帖尾如有所求詮為去其鏃虎瘡既愈跑泉以謝虎跑石古蹟猶存相隨歷四十寒暑不去一日鳴鼓召衆跏趺示寂逾半載開塋視之膚體如生頂髮垂肩削之復長乾符元年不雨縣令虔禱於塔甘澍立沛率士庶祝以太牢其全身忽隱入石中宋政和元年上官敦復督兵捕寇禱之而應遂因漕使柳某上其事於朝勅賜塔額曰慧慈

宋

普濟道者東津舖人少丐於邑夜宿荒邱日食之餘轉鬻貧者常誦大聖僧伽偈或問姓名應曰無日携錢六十九文詣興慶寺煮茶薦衆因號普濟歲大旱坐烈日中誦偈刻期而雨素不識字一日書偈端坐而逝時年六十九後人塑以金身祈禱響應道場即今觀音閣

靈應禪師名志勤叅馮山大師觀桃花悟道作偈云三十年來尋劍客幾回葉落又抽枝自從一見桃花後直至於今更不疑先開山懷安靈雲寺

及羅源仙茅寺後住邑靈應寺二十年坐化嘗幻身於四明市卵石無數附海舟歸曰吾三山靈應寺僧將以石造塔抵岸語舟人少需自往趣役者越日不至詣寺跡之莫得過開山堂見塑像儼然附舟僧也衆異其事累石爲塔

僧眞覺名義隆住錫玉泉寺具大願力政和六年造縣南通濟橋一十八梁宣和四年功完誓衆曰必沉我骨江水中則橋永無壞及圓寂衆感其誠因爲塔葬之橋南建永思菴祀之

鐵壁道人永貴里山藏人俗姓林號法明政和間遊龍虎山得授秘法療病禱雨屢有神效居小澳玄都觀二十年觀圯已久今爲民園往返閩浙人莫知其所止嘗遇晚宿淡洋人家聞內有呻吟聲問之主人曰婦久病如昏醉作痛何症也道人曰吾不知症但知療法因書符焚之須臾雷聲霹靂屋宇動搖震死大蝙蝠於房中婦隨起酬以金帛不受老不知所之佛燈禪師永貴里蟾步人俗姓阮出家建州登科院能出入禪定後住持

連江縣志

卷三十二

宋元明方外

二十八

鼓山寺復歸雲居寺造塔一座宣和二年勅賜佛燈晦室禪師嘗有句云三山南阮貧家子建郡登科小院僧行脚不知是甚箇却來日午說三更元

尼陳行因

嘉慶志因誤作烟

陳豹女幼慕佛法嘗言吾所至有三日夜可修禪定

者必建刹居之果至湧泉寺如所言

湧字疑是玉字之譌

遂捨田重建祝髮其中時

有造謠污讟者尼割臂自明臂斷無血衆異之爲立像以祀明

宗乘上人福寧人出家海島西洋山洪武四年以竹竿爲筏逆風浮海三百餘里至埕角後山衆相稱異黃祥甫建海潮菴居之七年四月十五日作偈云二十九年塵劫中今朝打破玉燈籠要識宗乘眞面目一輪紅日正當空身自火化鄉人競集語曰師去何以爲惠乃於火中躍出一盃一履云

善緣上人長樂梅花人俗姓許結茅鱸峯寺安德里諸生黃良佐讀書寺

中嘗勸以學道佐不之信每與對坐輒出神至佐家具知其事佐終疑之
值上元佐至寺曰燈宵殊寂善緣曰請居士一遊臨安可乎令閉目對坐
一剎那間如夢似醒果同徧閱西湖諸勝彩燈熒煌佐記一聯云五夜笙
歌尚有窮簷悲皓月六橋花柳更無隙地種桑麻自此始信服嘉靖間自
焚是日有鄉人自郡歸至北嶺遇善緣以錫杖挑僧鞋一隻曰煩將此鞋
歸敝庵鄉人回詣其庵僧衆方候火化大異之兼采通志

石田和尚會稽人精通內典明思宗常召禁中問成佛宗旨對曰陛下治
世自有帝王道法佛教特臣等自善其身耳思宗悚然重其言留半歲辭
歸甲申聞國變日夕號哭誓不與逆闖共戴天糾合義旅屢著戰功會唐
王入閩策杖從之拜護國禪師賜紫衣金印後依魯王通志作魯王從之據連江
及清兵至退隱琅崎白雲山已又結茅週溪白鼻巖常以詩厲其感慨詠
歸燕云陽春轉時和風起燕子歸來梁上語天涯多少未歸人見汝來時
淚如雨兼采通志

連江縣志

卷三十三

明清方外

二十九

尼性戒名阿霖吳質女質明末諸生國變後破家倡義事敗死之無子其
妻林氏潔身爲尼霖嫁於游早寡遂削髮從母歸空門嘗托鉢乞食遍覓
父骸不得慟哭而返盡籍遺產請宗人耐父於廟清

詩僧明鼎字宏耳祝髮於北禪寺後隨天童和尚遍遊巖壑住錫連之大
旻寺自號賣雲著有賣雲嘉山集甲乙隨錄語錄詩集共十餘卷晚年有
句云救饑畫餅飧將飽補衲松針鐵已磨七十年來渾似夢不辭辛苦作
南柯

詩僧淨機字木鷗福清人住持連江玉泉寺與鄭孟凌先生遊著有靈源
詩稿有初春過臺江卽事詩云斷橋流水獨潺湲官路惟聞羽檄傳一望
旌旗迷海嶠千聲鼓角動樓船當年芳草猶然綠今日春風自可憐喜得
故人茅舍在桃花無恙復爭妍宿竹林菴有句云犢歸千嶂晚犬吠一村
深

僧宜光邑下里人俗姓林幼不喜塵俗壯歲祝髮東峰寺三十餘載無徒伴敝衣含垢從不澣濯蟻蝨盤噉未嘗殘傷寺前路通省會炎暑臘雪烹茗以待往來者日煖薯糜於鍋供過客與樵豎恣啖之糧絕腹枵處之恬如也一夜聞叩門聲遽起視乃一虎當門徐曰爾毋傷人吾爲爾飽虎俯首去後徧遊諸寺不知所之

楊子桐邑下里人爲巫帥善符咒乾隆十年春旱桐爲刀梯四十九級跣登作法須臾雷雨沛然邑令馬彭年表其居曰力挽天河道士陳毓品居馬鼻乾隆時人幼業儒稍長皈正一教常被誣爲劫盜鄉鄰勸之避品曰有天在何避爲卒自赴訖邑宰廉知其冤釋之會邑治建醮命撰榜牒宣經懺見解迴出緇流宰旌之曰道中一儒

倪七馬鼻林家傭也素不如葷主者具夕膳故雜魚腥滅燈試之倪食之盡羣嘲焉倪曰余所啖者豆芽耳哇之果然尋自茶毗禱雨有驗立祠以祀額曰報功今在普照堂東

連江縣志

卷三十三

清方外

三十

信皈和尚鍊養內丹卓錫雲居下庵破寮中趺坐三年未嘗一偃臥日夜無倦容每食只噉飯一椀許間數日不食亦不言饑隆冬不擁絮不寒髮歲一燂不亂未久飛錫去

僧通誠俗家仙屏同治間年三十餘獲髮於白塔寺捨身爲功德徒募緣重建翠林寺脩連羅交界之琪溪橋又砌連西北賢義里之東湖矮嶺至三崗路十里清河里陀市週溪路十餘里四定鄉前至兪裴亭過嶺路四五里晚年筋力衰猶謀脩光臨里西溪橋以病不果其募緣也以彼所贏餘爲此之經始故人皆樂從而事易舉遠近信仰稱苦行僧